



LETTRE DE
MONSIEUR
LE PRINCE.

A LA ROYNE.

MADAME,
Toute mon affection à tousiours esté
le service du Roy & bien de cest Estat. Je l'ay
tesmoigné durant le vivant du feu Roy, par
mon absence necessitée, & depuis sa mort,
par mon prompt retour pres de sa Majesté,
ceillant les desplaisirs que j'ay receu des de-
sordres que l'on a vené assez frequens, pour
empescher les mouuemens, desquels eust
peu naistre la guerre, que j'ay estimé si dan-
gereuse & nuisible à la minorité du Roy,
Monsieur, que j'ay creu tous autres maux
plus tollerables. Si bien que par la grace de
Dieu, vostre bonté, & ma patience, nous
sommes en la quatriesme année de la mino-
rité du Roy, dans laquelle nous recognois-
sons l'accroissement de si grandes confusions

& pernicieux desordres, que vostre fufdite bonté & nostre patience, ne feroit allez forte, pour empescher le bouleuerfement & la ruine de cest Estat, prolongee iufques icy, par de foibles & honteux remedes, s'il n'y estoit vertueufement & prudemment pourueu par l'aduis de plusieurs Princes, Seigneurs, Ecclesiastiques, Officiers de la Couronne, & Cours fouueraines. Nous fupplions tres-humblement vostre Maiefté, d'y pouruoir de remedes falutaires, à l'acquit du deuoir à quoy, & vous & nous fommes obligez à Dieu, au Roy, & à la France. Supplication tres-iufte, que nous eufions faite nous mefmes deuant vostre Majesté, n'eust esté que la voyons entournee & preoccupee de peu de gens, qui veulent regner dans la confusion, feuls caufes de nostre depart, & non vostre Maiefté, de laquelle nous fcauons les louüables intentions de tant plus remarquables, que la verité vous a esté cellée, par ceux qui n'ont iustification que d'auoir maintenu vn peu de repos, dans lequel ils nous ont tramé vn continuel travail, par les confusions, prodigalitez, ventes d'honneurs & de reputation, ou ils ont prostitué tous les ordres de ce Royaume, duquel ils auoient mefuré la durée à leur vie, fans se foucier de ce qui aduiendroit apres. Repos non prouenu de leur conduite: ains des bons François, qui amateurs de paix, ont souffert toutes maluerfations, afflictions & charges, pluftost

que de susciter aucun trouble. Non que tous ne vissent qu'ils circonvienoient vostre Maïesté, partissant l'administration de ce florissant Estat, entre petit nombre de personnes, ayans pour tesmoins de leurs foiblellés la perte de la repuration de la France & pais estranger, & leurs desseins cachez, qui en ce grand Estat, qui ne souloit rien craindre, denoient estre secrets & ouverts, du moins aux Princes & Officiers de la Couronne, interessez en l'Estat, lesquels ils n'ont rendu participans des affaires, qu'autant qu'il leur sembloit necessaire pour authoriser leurs deliberations, apportans leurs resolutions de leurs logis au cabinet, & n'en faisant jamais conclure vne seule en vostre presence, à la pluralité des voix: mais les courans du maintien de l'autorité de vostre Maïesté, du cabinet de laquelle ils sortoient pour en dire leurs Arrests aux Princes, n'ayans receu leur aduis, que par maniere d'acquit, tendans à susciter des enuies & diuisions entre eux, fauorisans les vns & reculans les autres, faisant deux partis pour en auoir l'un à leur deuotion.

Artifices esprouuez si desastreux aux François, recommencez soudain apres le deces du Roy, que Dieu absolue. reiettant les salutaires aduis de feu Monsieur de Mayenne, qu'il n'estoit iuste de profiter ou rençonner la minorité de nostre jeune Roy, qu'il ne falloit rien demander & seruir ainsi que nous estions obligez naturellement.

A ij

Mais au contraire en interessant plusieurs particuliers pour les auoir a leur deuotion, ils ietterent l'Estat en des hazards tres d'angereux contre toutes formes vñtees, aux minorites des Rois, esquelles ont tousiours esté assemblez les Estats generaux, si necessaires que les Rois les ont conuokes en leurs maiorites, pour beaucoup moindres desordres que ceux d'apresent, pleust à Dieu, Madame, qu'il m'eust cousté partie de mō sang, que les eussiez assembles incōtinent apres le decez du Roy: vous fussiez en plus grande & aussi inste auctorité au gré de l'Eglise, de la noblesse, & du tiers estat. La France n'eust perdu ce genereux nom d'arbitre de la Chrestienté, acquis si glorieusement par le deffunt Roy, titre qui tenoit la ballance entre les deux grandes factions de l'Europe protegeant la tranquillité publique: & ceste perte d'autant plus tolérable, qu'il semble que nous soyons sortis du chemin que le feu Roy nous auoit tracé. On n'eust pas rasé la Citadelle de Bourg contre l'aduis des Princes, des officiers de la Couronne, mesmes de Monsieur le Conestable. On n'eust pas donné quatre cens mille liures tant pour le rasement que pour la recompense d'icelle. On n'eust precipité le mariage du Roy & de Mesdames ses Sœurs, auant que la loy de Dieu & tous les ordres, la maiorité du Roy approchant l'eussent approuué. Ces mariages eussent esté declares au public, non par la lecture d'un escrit

contenant les raisons qu'on auroit eu de le
halter, Mais en demandant auis S'il estoient
vtiles a faire.

Les Parlemens n'eussent esté empeschés
en la libre fonction de leurs charges.

Les gouuernemens des Prouinces & pla-
ces importantes n'eussent esté donnees a
personnes indignes & incapables.

On eust tasché a reuint les Ecclesiastiques
& la Sorbonne, non a les diuiser & oprimer
par vaines disputes inutiles en ce temps.

L'authorité des Prelats & Ecclesiastiques
n'eust esté violée, ains maintenue en
son entier.

On n'eust donné aucune charge ny par
faueur ny par argent.

L'aduis en eust esté demandé aux Princes
Pairs & Officiers de la Couronne pour par
vostre Maiesté estre apres conférés a gens
capables.

Les Ambassadeurs n'eussent esté choisis
que par le mesme aduis, leurs inclinations
n'eussent esté incognues a tous ceux qui ont
interest au bien de l'Estat.

Nullle depesche n'eust esté receue sans
estre veue & leue en presence des dessusdits.

On n'eust souffert les entreprises faites
sur la Nauare & Monferrat, ny empesché le
renouuellement de la ligue entre les Veni-
tiens & les Grisons tant approuuée & desi-
rée par le feu Roy.

On n'eust rompu le traitté de mariage proietté

par le feu Roy avec Monsieur de Sauoye sans meure deliberation. Et par vne entiere obseruation des Edits de ceux de la religion pretendue reformee.

On leur eust osté tout subiet de plainte, On eust reprimé ceux d'entre eux qui eussent passé les limites de leur deuoir:

On n'eust semé entre eux des diuisions leur faissant songer à leur particulier, ont failly a ietter le public & l'Estat en peril.

On n'eut donné trois cens mille liures pour l'achapt d'Amboise, payant de l'argent du Roy les places de sa Maieité.

On eust retranché tant ne dons immenses à personnes indignes.

Le peu de personnes ne se fust attribué les principales dignitez de l'Estat, sans aduis d'aucuns Princes ny des Officiers susdits.

Les Estats ou le Conseil vous eussent releuee de tant d'importumitez, se chargeant de l'enuie, & vous de benedictions.

Vostre Maieité considerera (s'il luy plaist) les desordres susdits & les suiuan, & par iceux iugera la necessité d'assembler les Estats generaux seurs & libres.

Le chastiment des meschans, & la recompense des bons, soustien des monarchies bien ordonnees, estans peruertis, donnent assez à cognoistre le danger de ce Royaume.

E Tous les offices de iudicature & des fi-

7
nances sont montez à prix excessif: il ne reste plus de recompense pour la vertu, puis que la faueur, l'alliance, la parenté & l'argent ont tout pouuoir ou que les finances sont de telle façon profuses, que les cent mille pistolles ne coustent rien, mesmes sont employees en choses de neant, & à gens qui s'enrichissent sans trauail du sang du peuple.

Les plaintes, clameurs & larmes des trois Estats couuent en leurs cueurs vn feu caché.

L'Eglise n'a plus sa splendeur, nul Ecclesiastique n'est plus employe aux Ambassades & n'a plus son rang au Conseil.

Les beneficiers sont surcharges de vexations & charges inouyes, la noblesse appauvrie & ruinee par tailles & impositions du sel, par commissions extraordinaires pour auoir de l'argent, toutes leurs danrees sont doiianees, tous leurs titres, biens que perdus & bruslez sont recherchez.

La Noblesse soustien de la France, terreur des estrangers, maistresse de la campagne, & vainqueresse des batailles, qui reestablist les sceptres & releue les couronnes, est maintenant taillee, bannie des offices de iudicature & finances, faute d'argent, leurs vies & biens en puissance d'autrui, priuee de la paye des hommes d'armes & archers, antiennement entretenus, & maintenant esclaués de leurs creanciers.

Le peuple lamente les charges qu'on trouuera redoublees par vne quantité de commissions extraordinaires, depuis la mort du feu Roy. Il faut que tout tombe sur les pauvres pour les gages des riches.

Les Edits & commissions qui auoient esté ou surseiles ou reuoquees incontinent apres la mort du feu Roy ont esté remises & augmentees.

Les Princes & officiers de la Couronne ausquels le feu Roy auoit toute fiance, ont esté esloignees & mal traictees.

On me rend presque par les discours qui courent, & tous les Princes & Officiers de la Couronne, qui me font l'honneur de conuenir avec moy en mesme aduis, comme perturbateur du repos public.

On tient conseil d'arrester des principaux Princes & Officiers de la Couronne, bien que sans crime. Ce qui paroist auoir esté delibéré contre la personne de Monsieur de Bouillon, & le refus faict à Monsieur de l'Ongueille d'aller exercer sa charge en son Gouvernement, monstre assez la continuation de leurs violences, & ce qui a esté executé en la personne de Monsieur de Vendosme, lequel sans considerer ce qu'il est au Roy, la mitié particuliere que le feu Roy luy portoit, non accusé innocent de tout crime, sans aucune forme de Iustice, sans aduis d'aucun grand de ce Royaume on a retenu prisonnier.

9

Cela est inusité en France, singulierement
durant la minorité du Roy : Ce que nous
royons n'auoir esté faict par aucun mauuais
naturel de vostre Maiesté, ny desir de faire
iniustice : C'est pourquoy nous la supplions
tres-humblement vouloir le faire deliurer,
fin que continuant à bien seruir le Roy &
Estat, il luy monstre par bons effects, cōme
la faict iusques icy, n'auoir iamais eu aucu-
e mauuaise intention contre son seruice.
On veut persuader à vostre Maiesté de s'ar-
mer : on prend pour pretexte nostre absen-
ce. Considérez, Madame, que nous proce-
dons par tres-humbles supplications & re-
monstrances, & non à main armée: Et quel-
es maledictions la France donnera à ceux
qui troublans le repos de cest Estat & tran-
quilité acquise par la vertu du deffunt Roy,
lèuetront les premiers les armes à la main.
Toute la France ne respire que la paix & vne
sainable & iuste reformation de cest estat.
Ira-il donc dit, Madame, que les mauuais
conseils qu'on vous donne, vous portent à
emprisonner les presens, & armer contre les
absens, qui procurent vne si saincte refor-
mation, & sont si fideles seruiteurs du Roy,
de vous & de l'Estat, vous donnans par ce
moyen, vn si ample sujet de gloire. Consi-
derez ma lettre, Madame, & vous n'y trou-
uerez rien de nos intereſts particuliers, ny en
nos intentiōs presentes, ny à l'aduenir : vous
ne pouuez trouuer mauuais si plusieurs vous
supplient d'vne mesmo chose, & tous la de-

firent, obligez par leur deuoir, & par l'amitié qu'ils ont contractez par vostre commandement. Pour pouruoir à tous les accidents dessus representez : Ie supplie tres-humblement vostre Majesté, de l'aduis de plusieurs Princes, Ducs, Pairs, Officiers de Couronne, Cours souueraines, Ecclesiastiques, & autres Seigneurs tant presens qu'absens, qui ont veu & approuué la presente supplication d'accorder l'assemblée des Estatz generaux libres & seurs, dans trois mois au plus tard : Et ce pendant retenir toutes choses en estat pacifique, Protestans de nostre part, que nous n'auons desir que pour la conservation de la paix, & bien de cest Estat : & que nous n'attenterons au contraire, si par vne precipitee resolution de nos ennemis, de ceux qui se courans du manteau de l'Estat sous vostre autorité, nous ne sommes prouoquez à repousser leurs iniures faites au Roy & à l'Estat, par vne naturelle, iuste & necessaire deffence. Supplication tres-humble que ie fais en qualité de premier Prince du sang, en l'estat que ie suis, & sans armes non ainsi que ceux qui pour profiter de telles assemblees faisoient des Villes, armoient le peuple, & des estrangers, faisoient guerre & paix à leur profit, pour vne Lieutenance generale, gouvernement de Prouince & de places, puis aydoient à eluder l'assemblée sans se soucier de la reformation publicque. Nous supplions aussi tres-humblement vostre Majesté suspendre l'execution du mariage, tant du Roy que de mes Dames ses

ſœurs, iufques à l'afſemblee deſdicts Eſtats.

Et pour montrer que noſtre particulier n'a nul pouuoir ſur nous ? Nous remettrons au Roy en l'afſemblee deſdicts Eſtats libres, & ſeurs, (Si la neceſſité de ſes affaires le requiert) toutes nos pentions & gratifications, contre les calomnies de ceux qui nous accuſent, qu'il n'y alloit que de noſtre particulier, que nous preferions au public meſdiſance de ceux qu'on dit aymer mieux mettre le feu au milieu de ce Royaume, que de voir leur autorité eſteinte ? Autorité pernicieuſe qui ſera renuerſee par noſtre iuſte & bon Roy, auquel nous ſupplions tres-humblement voſtre Maieſté vouloir faire donner bonne inſtruction, & luy oſter les conſeils de toutes partialitez qui luy ſont donnee contre ceux qui ont l'honneur d'eſtre ſes plus proches, & ſes plus fidelles ſubiects & ſeruiteurs. Et pour ſon contentement r'appeller le Cheualier de Vandoſme, tenir pres de ſa Maieſté pour le ſoin de ſa ſanté, perſonnes de vie, religion & probité requiſe, & cognüe. Nous ſupplions auſſi tres-humblement voſtre Maieſté, vouloir pouruoir aux Gouverneurs des frontieres de deniers ſuffiſans, pour vacquer à la conſeruation des places qu'ils ont en garde. Nous recognoiſſons noſtre Roy nous eſtre donné de Dieu. Nous ſçauons l'obeyſſance que nous luy deuons, & n'y manquerons d'un ſeul point. Nous eſperons auſſi que tous les Princes, Officiers de la Couronne, Cours ſouueraines, Eccleſiaſtiques, & Sei-

gneurs qui sont pres de vostre Majesté, se
 ioindront à nostre mesme desir, & auront tous
 ensemble préparé à vostre Majesté le che-
 min, l'honneur, & la gloire d'auoir restably
 tous les ordres de ce Royaume en leur pre-
 miere splendeur & liberté, reformé ce Roy-
 aume, & rassuré leur repos avec autant de
 los, que si vous en auiez acquis vn autre, res-
 pondant genereusement à ceux qui disent les
 Estats diminuer l'autorité du Roy, que vous
 l'aurez raffermie, & réduite perdurable. Nous
 vous voulons seruir & assister ausdits Estats,
 ainsi qu'il sera recognu vtile au seruice du
 Roy, à la France, & à la conseruation de l'au-
 thorité Royale, & de celle de vostre Majesté,
 estans ses tres-humbles seruiteurs. Et en par-
 ticulier ie la supplie tres-humblement de
 croire que ie suis.

M A D A M E,

Vostre tres-humble,
 tres-obeyssant serui-
 teur & sujet,
 Henry de Bourbon.

De Mezieres le 18. de Feurier 1614.

*Lettre de Monseigneur le Prince, au Parlement de
Paris, presentee par le Sieur de Fiesbrum,
le 22. Feurier 1614.*

MESSIEURS,
Le sçay que l'on preuiendra mes iustes
intentions de beaucoup de calomnies, & faux
bruits tous contraires, ie m'asseure, à l'opi-
nion que vous en prendrez, comme m'ayant
assez pratiqué, & recogneu, qui craignant
d'alterer quelque chose par mes resolutions
que i'ay eues au seruice du Roy, & bien de
l'Estat, i'ay retenu mes iustes ressentimens, &
les ay cōme enseuelis par ma patience: Mais
encor vous veux-ie mieux esclaircir, & ren-
dre compte, comme de mes actions, à vous
dis-ie, que ie recognois estre la principale tu-
trice de cest Estat. C'est pourquoy ie vous
enuoye la copie de la lettre que i'ay escrite à
la Royne, par ou i'expose entierement les
sainctes affections qui m'ont meu à me reti-
rer de la Court, pour ne communiquer, ny
adherer, comme contrains, aux abus qui si
commettent par ceux qui manient, & dispo-
sent à leur volonté des affaires du Roy & de
l'Estat, en demandant la reformation avec
tres-iuste supplicatiō à la Royne, luy en pro-
posant le remede, & le requerant comme
premier Prince du sang, sujet du Roy, qui ay
le principal interest au bien du seruice de sa
Majesté, n'ayant pour toutes armes, que mes

très-humbles prieres à sa Majesté, comme
vous verrez par la copie que ie vous en-
noye. Vous suppliât humblemēt, Messieurs,
m'asister de vos conseils, autorité en ceste
si loüable & raisonnable entreprise, cōme les
plus considerables au service de sa Majesté,
& reformation de l'Estat. Ce faisant vous
vous acquiterez de vos charges, & acquere-
rez gloire & reputation, demeurant,

M E S S I E V R S,

Vostre bien humble &
tres-affectionné ser-
uiteur, H E N R Y
D E B O V R B O N.

De Mezieres ce 18. Feurier, 1614.